

IBOKPOT YE IDIŌK MKPASIP

Matthew 13:24-30; 36-43

ŌYŌHŌ UKPEP-ŊKPO 76

Eke Mkparawa

IKŌ IBUOT: “Edieke owo mitŌñŌke ntak imana, enye ikemeke ndikut Obio UbŌñ Abasi” (John 3:3).

EñwŌñŌ NdinŌ Edidem

Ke mme ñke emi nnyin isuk itiñke ibaña, Jesus ndinŌ mbet Esie ekikere ke abaña nte Obio-ubŌñ Heaven etiede. MmŌ ema efiŌk ebaña ndusuk ñkpo emi mme anditiñ-ntiñ-nnim ikŌ ekewetde, enyuñ ediŌñŌ ete ema eñwŌñŌ ndinŌ mmŌ Edidem emi edidide ndisio mme asua mmŌ usiene; ndien Enye eyeda ubŌñ ke nsinsi. Jeremiah ama ewet ete: “Jehovah ōŌhŌ, ete, Sese, usen ke edi eke ndinamde edinen nsehe otibe ōñŌ David, ndien edidem kiet eyeda ubŌñ, onyuñ okut unen, onyuñ anam edinen ikpe ke isŌñ” (Jeremiah 23:5).

Ke ini Jesus ekedide, mmŌ emi ekenyenede ñkukut spirit ema ediŌñŌ Enye nte Edidem. Ñwed Abasi etiñ abaña Joseph owo Arimathaea, emi ekebeñede okpo Jesus, emi ke idemesie “etiede ebet UbŌñ Abasi” (Mark 15:43). Ke ini Nathanael ekeyerede ikot Jesus, enye ete: “Rabbi, Afo edi Eyen Abasi; Afo edi Edidem Israel” (John 1:49). Jesus ama etiñ ōñŌ mme owo nte ntiñ-nnim ikŌ Zechariah ōwŌrŌde osu ke Idemesie ete: “O adiaha Zion, dat esit eti eti; sio mkpo idara, O adiaha Jerusalem: sese, edidem fo eyedi ke ōtŌ fo; enye enen, onyuñ onim idem ke andinyaña; enye edi suñ-suñ, onyuñ odoro ke ass” (Zechariah 9:9; Matthew 21:5). IdiŌñŌ emi okodude ke krŌs ke ini ekekŌnde Jesus eketiñ ete: **“EMI EDI EDIDEM MME JEW.”**

Ntem ke nnyin ikut ite Jesus ekedi Edidem, mbet Esie ema enyuñ enim emi ke akpanikŌ. Edi edidem enyene ndinyene obio emi enye akarade; ndien mme anditiene-Christ ekedomo ndifiŌk ini emi Enye ediwukde obio-ubŌñ Esie. MmŌ ekeyom ndikut ke utibe usuñ nte Enye edibiatde ukara mbon Rome ifep emi akanamde nditŌ Israel edu ke idak ufin ke ediwak isua, onyuñ anam mmŌ edara ndikara idem mmŌ ke Palestine. MmŌ ema ekut Jesus ke esit mmŌ ke ebekpo ukara isŌñ emi, ye nte mmŌ ekenyenede ikpo itie ke ukara Esie. Ke idem ini emi Jesus ama ōkŌŌhŌ mmŌ ke ImŌ iyom ndika ke Jerusalem man ekekŌñ ImŌ ke krŌs mmŌ ema ebup mme anie edidi akamba ke obio-ubŌñ Esie. Etie nte mmŌ ikŌfiŌkke ite ke UbŌñ Abasi idighe “eridia ñkpo ye eriñwŌñ ñkpo, edi edi edinen ido ye emem ye idaresit emi odude ke Edisana Spirit” (Ñwed Mbon Rome 14:17).

Ekikere Mbet Okpu

Ke ini Jesus okodukde Jerusalem ubŌñ-ubŌñ, ke ufŌt otu owo emi ekefioride mkpo idara, mbet ema edu ke uyuhŌ ete ke ini ekpere emi Enye ediyararede Idemesie nte edidem mme Jew. Idahaemi mmŌ eyom ndikut nte mbon Rome edude ke esuene, ndien mmŌ ke idem mmŌ eyekabare eda itie mme andikara mmŌ. Okodoro adaña didie, ke ekikere mmŌ ama okokpu ke ini esimde Jerusalem ndien Jesus iwutke baba idiŌñŌ eñwan ndomo kiet! Utu ke oro, ke ñkpo nte urua kiet, Enye ama ōsuhŌre idem ōñŌ mkpa ke krŌs.

Ke usuñ Emmaus, ke ema ekekŌñ Enye, nnyin ikut owo iba ke otu mbet ewutde mfuhŌ eti-eti etiñ ebaña nte ekikere mmŌ okpude. MmŌ ete, “nnyin ikodori enyin ite edi Enye edifak Israel” (Luke 24:21); ndien idahaemi Enye ōnyŌñ inyuñ inimke ubŌñ Esie mi.

Obio-ubŌñ Christ

Obio-ubŌñ Christ enye? Enye ama ōŌhŌ ke Idemesie ete ke ImŌ idi Edidem; ndien edidem enyene ndinyene obio-ubŌñ. Mme anie ndien edidi nditŌ Obio-ubŌñ Jesus?

John ōduŌk-owo mmŌñ ama ōñŌ ntŌt ete, “mbufo ekabare esit; koro UbŌñ Heaven ke ekpere” (Matthew 3:2). Nte enye ama anam ndudue? Nte Jesus ama ōkpoñ isŌñ ye unana erikan? Ih ih! Obio-ubŌñ ama enyene eritŌñŌ esie; ema esin itiat-idak-isŌñ ebeñe akamba Ukara TŌsin Isua emi edidide ke ini Jesus edidide Edidem ndien “eyekpe ikpe mme ubuene esin ke edinen, onyuñ ebire ikŌ nte enende ōñŌ suñ-suñ mbio isŌñ: onyuñ amia isŌñ ke eto inua esie, onyun owot mme idiŌk owo ke ibifik mkpok-inua esie” (Isaiah 11:4). Jesus okodu ke isŌñ, nditañ mme owo mbon nnŌ obio-ubŌñ Heaven oro; ndien ke Enye ama ōkŌnyŌñ ke Heaven, Enye ama ōñŌ mbet Esie uyo ndika ke ofuri ererimbot nnyuñ nnam kpukpru owo ekabare esit man enyene ebuana ke obio-ubŌñ Heaven. “Edieke owo mitŌñŌke ntak imana, enye ikemeke ndikut obio ubŌñ Abasi” (John 3:3). Ndien mbet, ke ema ekebŌ uduŌk-mmŌñ Edisana Spirit ke Usen Pentecost, ema eka iso ndikwŌrŌ mbuk erinyaña ukpoñ emi editimde nditŌ-isŌñ idem ke abaña Obio-ubŌñ Heaven. Nti mme ōkwŌrŌ-ikŌ Abasi mfin emi ke ekwŌrŌ ukem etop oro, “Mbufo enyene nditŌñŌ ntak mmana;” ndien Spirit Abasi ke adada esit nditŌ owo ōñŌ Edidem UbŌñ emi editŌñŌde ntak idi ke isŌñ emi ndinyuñ ñkara ye ndisana ikŌt Esie ke tŌsin isua.

Ndikọri Ọtọ kiet

Ke ini Jesus eketiñde ikọ emi ọnọ mbet Esie abaña ñke idiọk mkpasip ye ibokpot, Enye ete ke ete-ufọk etiñ ọnọ nditọ-ufọk esie ete eyak idiọk mkpasip ọkọri ọtọ kiet ye ibokpot tutu ini ukpeñe. Ndien ke iyenọ mme anditañ uyo nditañ idiọk mkpasip mbon ke saña-saña ebek man enyuñ esin mmọ ke ikañ efọp. Eyediọñ ndien ibokpot man etañ mmọ ekenim ke ubet-udia.

Jesus ete ke nti mkpasip edi nditọ obio-ubọñ, ke ini idiọk mkpasip adade ọnọ nditọ Satan. Enye iyomke ndisioño nditọ Esie usọp-usọp mfep ke ererimbot ke ema ekenyaña, edi mmọ enyene ndiduñ ye mme anam-idiọk tutu ini ukpeñe ke ini Enye edidọñde angel man abahare nti owo ye mme idiọk owo. Mmọ emi ekekpañade eyeset, ndien eyebahare mmọ ke ukem usuñ nte mmọ emi ekedude uwem ndikut utit ererimbot. “Ọbọñ ọmọfiọk ndinyaña mmọ emi eteñede Enye nsio ke idomo, ndinyuñ mmum mme idiọk owo nnim ke itie ufen, tutu osim usen ikpe” (2 Peter 2:9).

Mbuñwum Spirit

Ndusuk “ndiọi mkpasip” ekeme ndidomo nditie nte mme anditiene-Christ. Ke ini eto ekedide nsek, owo ikekemeke nditiñ ukpuhọre; edi ke ini ama ọkọtọñ ndisioño mfri, nditọ-ufọk ema efiọk ete ke mbiet ekọri ke otu ibokpot. Nnyin imọfiọk ite ke mme Pharisee ekedi mme ọfiọk ikọ Abasi eti-eti, enyuñ ebat idem mmọ nte nditọ Abraham, edi koro mmọ ema enyene idiọk-ñkpọ ke esit mmọ, Jesus ọdọhọ mmọ ete, “Mbufo edi nditọ ete mbufo, kpa Satan” (John 8:44). Ke ini efen Jesus ete, “Mbufo eyeda mfri mmọ efiọk mmọ” (Matthew 7:16). Emi owut ete ke afo emekeme nditiñ me ewe edi nditọ Obio-ubọñ Heaven, me ewe enyuñ edi nditọ Satan oto ke usuñ eke mmọ edade enam ñkpọ. Nditọ Obio-ubọñ Heaven enyene mme ñwọrọ-nda edu uwem emi ewetde ete, “Mbuñwum Spirit edi ima, ye idaresit, ye emem, ye ime, ye mfọnido, ye eti ido, ye erinam akpanikọ, ye ifure-ifure ido, ye mfara ke idem” (Nwede Mbon Galatia 5:22, 23).

Nsin-ifik Emi Misañake Ye Ifiọk

Ekikere ama okpu nditọ-ufọk enyene iñwañ ke ndikut idiọk mkpasip nte ọkọride ke otu mme ibokpot, enyuñ eyom ndidibere mmọ mfep ini kiet. Mme idiọk mkpasip ekedi mbiet emi ekotde nnyanyaña emi esiwakde ndibuaha idemesie ye nti eto eken onyuñ ọsọñ eti-eti ndidibede mfep ndien etre ndibiat ibokpot.

Nnyin imokut ke mbuk ufọk-Abasi ibaña ke ini emi mmọ emi enyenede ifiopesit obukpo ido-ukpono Abasi edidahade ida oto se mmọ enimde ke akpanikọ ndien mmọ eyewot kpukpru mmọ emi minyimeke ye mmọ. Ke eyo Christ ke adañaemi mbon Samaria ekesinde Jesus, mbet Esie ema eyom ndikot ikañ oto ke Heaven edita mmọ, edi Jesus ama asua ọnọ James ye John onyuñ ọdọhọ ete, Imọ ikedighe ndibiat uwem mme owo edi ikedi ndinyaña mmọ (Luke 9:52-56).

Idiọk mkpasip ye ibokpot ema ekọkọri ọtọ kiet ke ini oro, ndien enyuñ eka iso ndinam ntre. Ke ini utit ererimbot edidide, ini emi edifọpde idiọk mkpasip ke edeme-ikañ emi asakde, Jesus eyesio “usiene ọnọ mmọ emi mifiọkke Abasi, minyuñ isukke ibuot inọ Gospel Ọbọñ nnyin Jesus; emi edidianarede ke iso Ọbọñ ye ke iso Ubọñ odudu Esie, edibọ ufen nsinsi nsobo” (2 Nwede Thessalonica 1:8, 9).

MME MBUME

1. Nso ke eti mkpasip oro akada ọnọ?
2. Mme anie ekedi idiọk mkpasip?
3. Adaña didie ke ibokpot ye idiọk mkpasip edikọri ọtọ kiet?
4. Nnyin ikeme didie ndidi nditọ Obio-ubọñ Heaven?
5. Anie edi Edidem oro?